

REGIONAL NEWS BULLETIN

HEADLINES (EVENING)

- 1. UD & PA Minister Pu K. Sapdanga chuan sorkarin Aizawl khawpui vawn faina atan ‘Comprehensive Plan for Municipal Waste Management in Aizawl’ siam a ni, a ti.
- 2. Kuminah African Swine Fever vawk pulhri avangin vawk 521 thi leh tawhin vawk 107 suat a ni leh tawh.
- 3. Ram pumah Muslim-te kut pawimawh Id-ul-Fitr uar taka lawm a ni.
- 4. Punjab Police-in heroin Kg 15 an man.



UDPA

UD & PA Minister Pu K. Sapdanga chuan sorkarin Aizawl khawpui vawn faina atan ‘Comprehensive Plan for Municipal Waste Management in Aizawl’ siam a ni, a ti.

He thu hi vawiina Sikulpuikawn a Faina Hnatlangpui hawnna-ah sawiin Pu K Sapdanga chuan damdawi-in bawlhhlawh chu a hranna sawngbawl tura ruahman a ni, a ti a. Tun dinhmunah sorkar chuan Bio-medical Waste Management Rules 2016 a siam chu tihlawhtling turin Sairang a bawlhhlawh paihna tur hmun siam a ni tawh a. Naktuk atanga damdawiin bawlhhlawh bik chu phurkhawm a sawngbawl thin a ni tawh dawn a ni, a ti. In sakna leh inthiahna bawlhhlawhte chu a hranpa a sawngbawl tura kalpui tumna dan chu sorkar laipuiin kum 2016 khan a siam tawh a. Chumi bawhzui chuan Mizoram sawrkar pawhin Hualngohmunah in sakna bawlhhlawh thenfai na tur bik Demolition waste Management Construction & Demolition Waste Management Plan a siam chu kumin chhunga peihfel tum a ni-in hemi hmunah hian insakna bawlhhlawh te chu sawngbawl tum a ni, a ti.

Pu K Sapdanga chuan Aizawl khawpui bawlhhlawhte chu tawih thei leh tawih thei lo a thliar hrang a tawih thei ho zawng chu Aizawl khawpui chhuah lam tuna bawlhhlawh paih mekna hmun Tuirial kamah paih tum a ni, a ti a. Tawih thei bawlhhlawhte chu leitha a chantir theih tum chu a tha a, mipuite’n an hman tangkai chhunzawm theihna tura sawngbawl tum a ni a ti. Heta tang hian leitha siamchhuah a ni tawh a ni a. Bawlhhlawh tawih thei loho zawng chu Aizawl tlak lama sawngbawl na tura ruahmanna siam a nih thu leh Material Recovery Facility (MRF) siam tum a ni a. Nitin bawlhhlawh ton 75 sawngbawl

thei tur ruahmanna chu nakum April atanga hman tan theih tura ruahmanna kalpui mek a nih thu a sawi bawk a ni.

Vawiina Faina Hnatlangpui hi Central YMA, Aizawl Municipal Corporation leh UD&PA Department thawhhona hnuaia huaihawt a ni a. Faina Hnatlangpui-ah hi vawiin atang khan Aizawl veng hrang hrangah kalpui niin kum khat chhung Veng Fai intihsiakna hi kalpui tum a ni bawk a ni.

<><><>

MUHCS

Naktuk atanga a taka hman tan tura ruahman Mizoram universal health care scheme (MUHCS), pawisa fai pek ngai lova damdawi lama inenkawl theihna tur chu pawl 2-in an duh lo.

Sum fai pek ngai lo (cashless) a kalpui tur MUHCS hi April ni 1 atanga a taka hman tan turin March ni 19 khan chief minister Pu Lalduhoma chuan a lo hawng tawh a. Damdawi-in a inenkawlte'n an inekawlina senso pek ngai lova ruahmanna chu Non-Government Hospital Association of Mizoram (NGHAM) chuan tun dinhmuna an zawm theih loh tur thu Mizoram State Health Care Society-a chief executive officer chu March ni 28 khan an hriattir a. Mimal leh kohhran enkawl damdawiin-te hi te hi nitina pawisa lut hrang hrang hmanga kal hram hram an nih avangin cashless anih chuan an inenkawl zo dawn lova, damdawiin sum che vel a buai phah dawn avangin an tak damdawiin enkawl a harsat phah dawn niin an sawi a. Hun kal tawha Mizoram sorkar hnuaia Healthcare Scheme hrang hrangte kalpuina-ah NGHAM member damdawi-inte chuan belhkhawmin cheng vaibelchhe 4 chuang an lo hloh tawh niin an sawi bawk. NGHAM chuan Mizoram Universal Health Care Scheme thar duan, cashless hi tun dinhmunah chuan an zawm theih loh thu leh, he mi avanga mipui tawrhna nasa tak lo thleng thei hi pumpelh a nih theih na'n, a hma a re-imburement kalphunga an kal ang khan kal leh phalsak turin an ngen a ni.

Hetih lai hian Mizoram sorkar hnuaia a thawk inzawmkhawm pawl Federation of Mizoram Government Employee & Workers (FMGE & W) pawhin MUHCS zawm ve an duh loh thu chief minister hnenah tun hnai khan an thlen bawk a. An zawm ve duh loh chhan hrang hrang an tarlan zingah damdawi lama inenkawlina rate tlawm taka siam a nih avangin anmahni'n a hranpin sum tam tak an seng dawn ni a sawi-in an duh lo niin an sawi a ni.

<><><>

POOR FEDERATION

Mizoram Poor Federation chuan mipui tana sorkar hnathawkte leh Mizoram universal health care scheme (MUHCS) hmang duh lova inhnukdawk damdawi-in te chu sorkar thuchhuak pawm a zawm turin an ngen.

He thu hi vawiina Aizawl Press Club a chanchinbumite an kawmnaah sawiin an pawl president Pu Lawmthanga chuan ram budget atanga za a 82 vel zet an hlawh leh inrelbawlina atanga hmang sorkar hnathawk an hlawh atanga thla khata thawh tur sorkarin a bituk sak chu hlawh nei lo pawhin inenkawlina tur atana pawisa an thawh dawn lai a an tha a na tlat chu mahni hmasialna nasa tak a ni, a ti a. Sorkar hnathawk lovin kumkhata inenkawl na'n cheng

nuai 5 an hman theih lai a sorkar hnathawk nghet tan inenkawlina senso turah bituk a awm lo a. Miretheite inhlawhfa chawpte nena khaikhin pheih chuan hei ai a tam hi thawh inhuam zawk awm tak ni a an hriat thu a sawi a.

Mizorama aia state hausa Karnataka, Kerala state a sorkar hnathawkte pawhin health care atana contribution an pe daih tawh a ni, a ti a. Mizoram sorkar hnuaia hnathawkte’n MUHCS an duh lo hi inngaihtuah tha leh se an duh a. MUHCS hmanga inenkawlina atana pawisa pek lawk ngai lova inenkawlina man kartin emaw thla khat aia rei lo bill sorkarin a peksak thei tur chu a lawmawm hle a ni, a ti a. Damdawi-in thenkhatin MUHCS an hmang duh lo lehzel te chu mipui hriselna leh damna aia pawisa ngainat lutukna ni bera an hriat thu leh hospital zawng zawngin MUHCS chu hmang vek se an chuan a duh takzet a ni, a ti bawk.

<><><>

ASF

Tun hnai lawka African Swine Fever (AFS) hri a len thar leh tak avangin he vawk pulhri avang hian vawk 521 thi leh tawhin vawk 107 suat a ni leh tawh bawk niin Vety department hotute chuan an sawi.

Vawiin khan Mamit district a Zawlnuam khua-ah vawk 4 a thih belh leh a, Lawngtlai khua a veng 2-ah vawk 7 thi-in Bungtlang South khua-ah 1 a thi bawk a. Vawiina vawk thi zawng zawng hi 12 a ni a. Zawlnuam khua-ah AFS vawk pulhri vei 13 suat a ni bawk. Tun dinhmunah hian Lawngtlai district leh Mamit district a khua leh veng 13-ah a leng mek niin Vety department hotute chuan an sawi a ni. Nikum December ni 24 atanga ni 80 chuang ASF vawk pulhri avanga vawk thi leh suat a awm tawh loh hnu-ah March thla laihawl vela vawk thi report dawn a nih leh tak avangin vawk thi leh damlote sample endik hnu chu Guwahati laboratory-ah thawnin March ni 20 khan African swine fever vawk pulhri vang a ni tih a rawn finfiah ta a ni.

Kum 2021 chhunga vawk suatsak chhugkaw 2,488 hnenah zangnadawmna hi kum 2022 ah pek an ni a. Kum 2022 chhunga vawk suat chhugkaw 1,915 hnenah za zela 25 chu kum 2024 ah te pek an ni a. Kum 2021 a suatte hnenah cheng vaibelchhe 11, nuai 69, sing 9 leh sang 4 pek chhuah tawh niin kum 2022 a suat sakte hnenah cheng vaibelchhe 2, nuai 63, sing 3, sang 1 leh 500 pek an ni tawh a, a vai-in cheng vaibelchhe 14, nuai 33, sing 2, sang 5 leh 500 pek a ni tawh a ni.

<><><>

TEACHERS

School education minister Dr. Vanlalhlana chuan tun dinhmunah High School-ah hna nghet 587 a ruak mek a, Middle School-ah hna 1,356 ruak mekin Primary School-ah hna nghet 1,231 a ruak mek a ni a ti.

Minister-in a sawi dan chuan school education department hnuaiah a nghet lovin zirtirtu 1,183 lak an ni tawh. Primary school-ah a nghet lovin zirtirtu 234 lak tum mek a ni a, advertisement chhuah ni tawhin heng hna ruakte hnawhkhat tur hian hmalak mek a ni a. Samagra hnuaia thawkte dah nghehna tur dan a hranpa in a awm lova. Amaherawhchu, Mizoram sorkar in CSS hnuaia thawkte dah nghehna tur ‘Government of Mizoram Regularisation

of Centrally Sponsored Scheme (CSS) Employees Scheme, 2024’ a siam a, hemi a an luh ve theihna tur hian department-in a buaipui mek a ni a ti. Tun dinhmunah dah ngheh an la awm lo niin a sawi a. Sikul hrang hranga thawk tur LDC hi post 270 ah post 136 lai a ruah avangin indaih lohna a nasa a, tun dinhmunah chuan a nei lo sikula dah tur hi sorkarin a la nei rih lo a ni.

Tun dinhmunah hian Govt. High School 22 leh Govt. Middle School 239-ah headmaster nghet an awm lova. Zirtirtu atana lak, an thawhna tur sikul a thawk lova education department pisa lama chhawr (attached) tak zawk hi mi 200 an awm mek bawk a ni. Mizorama zirtirtu nghet awm lohna sikul hi a vaiin 160 a ni a. High school-ah chuan Govt. Vanzau HS-ah zirtirtu nghet an awm lova. Primary school 105-ah zirtirtu nget awm lovin middle school 54-ah zirtirtu nghet thawk an awm lo bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ID-UL-FITR CELEBRATED

Muslim-te sakhaw kut pawimawh, Id-ul-Fitr chu vawiin khan ram pumah uar taka lawm a ni a, Muslim-te chaw nghei thla tawp ni a ni bawk a ni.

He ni pual hian Muslim-te chu thawmhnaw thar nen an biak in-ah an tawngtai a, an chhungte leh thianthate nen duhsakna thilpek chi hrang hrang inhlan tawnin hlim takin hun an hmang a ni.

President Droupadi Murmu leh Vice President Jagdeep Dhankhar-a ten he ni pual hian ram mipuite chibai bukin duhsakna an hlan a ni.

<><><>

EID-UL-FITR

Aizawl Mosque Committee leh Mizoram Muslim Welfare Society General Secretary Mohammad Mamon Majumdar chuan Mizorama hnathawh tum emaw hnathawka awm lai mek te tan Inner Line Permit (ILP) chu neih ngei a tul a ni, a ti.

He thu hi Aizawl West-2 Joint YMA Field, Vaivakawn a Muslim sakhaw zuitute’n Ramzan thla a an chawnghei tawp ni an lawmna, Eid-UL- Fitr hmanna-ah sawiin Md. Mamon Majumdar chuan an awmna hmun ang zela insiamrem a tul thu leh ram dan an lo siam sa te chu zawm a pawimawh a, chu chu Quran ah pawh ziak a ni a ti a. Aizawl West Joint YMA Chairman Pu Rualhlupaia leh committe member-te chungah khelmual hman an phalsak chu

lawmawm a ti a. Eid Ul-Fitr atana an mamawh anga Police te’n an buaipui chu lawmawm a tih thu a sawi a.

Md Mamon Majumdar chuan kalkhawmte chu pathian tihna nena hun hmang chu thil pawimawh a ni, a ti a. Mizo mipui chungah pawh lawmthu sawiin an mamawh ang hnathawh tur an neih theihna chhan chu Mizo mipuite an ni a. Mizoram Muslim Welfare Society an thawh puinaah leh an thlawpna avanga tun dinhmun thleng thei an nih thu a sawi bawk a ni.

Aizawl Mosque hi kum 1966 March Ni 5 khan a lo kang tawh a. Aizawl Mosque Committee President ni thin Pu M. Bakhtar Uddin Majumdar kaihhruaina hnuaiah a sak hna hi thawh that leh a ni a. Vawiin Eid-Ul-Fitr tawngtai rual hian Mizoram Muslim Welfare Society member 3,000 chuang an kalkhawm a. Pushpak Mosque-ah mi 500 chuang leh Sairang Mosque ah mi 100 atanga 150 chuang an kalkhawm bawk a ni.

<><><>

PUNJAB POLICE ARREST

Punjab Police-in Tarn Taran-ah ruihhlo tawlhru thin mi pakhat an man a, a kut atang hian heroin Kg 15 an man bawk. An mi man hi Pakistan leh USA-a inkhuar ruihhloa sumdawng liante nena inkungkaihna nei a ni.

Punjab DGP, Gaurav Yadav-a’n a sawi danin, state sorkarin ruihhlo do beihpui, Yudh Nasheyen Virudh a thlak hnua tum khata ruihhlo man hnem ber tum a tling a, an mi man hi Amritsar-a inkhuar, Harshpreet Singh-a niin a ruihhlo kawlte chu Pakistan lama a thawhpuiten drone hmanga an thlak tur a ni a, ruihhloa sumdawng dangte hnena an hralh hnuah an hralhna sum chu USA-a an hotu liante hnenah thawn tur a ni.

He thilah hian thubuai ziah luh a ni a, chhui zui mek a ni.

<><><>